



Retrospectiva e prospettiva «senza»

AUGUSTIN BEELI/FMR (TEXT E FOTOS)

La scumiada digl onn ei per biars in termin da trer bilanza. Ins duess denton buca concentrar gl'onn 2021 mo sin corona, mascrina, covid-19, virola ni buc virola, uffeci federal da sanadad eav. Igl ei clar che cefras e novitads en quei regard han dominau gl'entir onn vargau. La redacziun dalla FMR ha fatg ina retscherca spontana per eruir sch'ei ha aunc dau auter. Gliez ha ei dau en tuttcass. Las 12 persunas plidentadas spontanamein conferman quei, miran anavos e reflecteschan d'enqualin «highlight» dil 2021. Cundiziun ei stada ch'els mettien la pandemia en parentesa. Els han cumplettau la retrospectiva cun ina prospectiva. Era cheu puspei culla cundiziun: metter en parentesa covid-19 eav. Apparentamein eis ei il giavisch general da finadin che la pandemia fineschi e lubeschi da returnar alla «normalitad». Ils 12 plidentai tradeschan da lur projects, plans, tierms e perspectivs persunalas per 2022.



Anne-Louise Joël, Vella

La lavur da menadra dalla Casa d'Angel ha dau a mi gl'onn vargau gronda cuntentientscha. Che nus havein astgau arver l'exposiziun dils lufs a Lumbrein ei stau ina sfida extraordinaria. Nus havein giu fetg biars e buns resuns. Igl ei in'exposiziun ch'ils hosps da vacanzas schazegian fetg, tut priu eis ei in grond success. Pigl onn 2022 giavischel jeu che nus sappien cuntinuar cun quei slontsch ella Casa d'Angel. Jeu selegrel dalla nova exposiziun cun in'otra tematica. Jeu giavischel era ch'ei seigi puspei pusseivel da far cultura culla ed ella cuminza. Quei manca fetg.




Aurel Pfister, Schlans

La stad sun jeu staus cun bab e mumma, e cun Giacumin e Valeria sil Muot da Rubi. Miu bab haveva empermess che nus vesien ils capricorns. Quels havein nus lu era viu si leu. Aunc avon essan nus stai la primavera enta Pontresina. Leu hai jeu viu per l'emprema gada endretgs capricorns, in'entira muntanera cun gronds corns. Suenter las vacanzas da stad mondell jeu a scola. Jieu selegrel d'entscheiver l'emprema classa tier scolasta Rita. (Era per il bab Bruno Pfister ei la sapssegiada sil Muot da Rubi stau il highlight digl onn. Dapli da ses highlights sutvart, commentari dalla redacziun.)




Bruno Pfister, Schlans

In highlight che vegn endament a mi dil 2021 ei la tura culs affons sil Muot da Rubi. Vinavon hai jeu giu gronda satisfaziun cuagl andament dil project La Péra. Il runal renouau havein nus saviu prender en funcziun exact sill'entschatta da questa stagium. Las empremas experientschas ein empermettontas, il runal vegn duvraus stediamein. Pigl onn niev selegrel jeu sils viadis da vendita ell'America. Jeu astgel puspei ir per mia patruna, la Kissling AG, per cussegljar clientella els Stadis Uni.



Avat Vigeli Monn, Mustér

Ina gronda sorpresa dil 2021 ei stada che miu num ei cumparius silla gliesta da treis ella procedura d'elecziun digl uestg niev da Cuera. Jeu sun leds che quei calisch ei ius sper mei ora, pertgei jeu vi survir vinavon a nossa claustra cheu a Mustér. Jeu hai plascher d'in post en quei connex. Gl'onn 2021 han mes confrars dallas siat claustras benedictinas elegiu mei sco preses. Lu hai jeu grond plascher che dus confrars giuvens ein entrai il 2021 en nies convent. Il giavisch grond pil 2022 ei ch'ei mondi bein cun nossa scola e che nus sappien mantener quella. Suenter che la baselgia claustrala ed il contuorn ein sanai, vegnan ils baghetgs dalla scola vidlunder.



Linus Flepp, Mustér

Las exposiziun parallellas a Segnas ed ella claustra da Glion ein stadas per mei in punct culminont dil 2021. Jeu sundel leds ed hai grond plascher che quei ei insumma stau pusseivel. Las exposiziuns ein stadas en cumbinaziun cul cudisch che muossa la retrospectiva da mia lavur artistica. Jeu hai era plascher che tonta gliעד dat curascha e motivescha mei. Il project grond ch'jeu haiel per gl'onn niev ei da restar sauns e taffers. Bugen contribuesch'jeu era vinavon la caricatura ella Quotidiana. La gliעד duei buca emblidar da rir, gliez fuss miu giavisch principal pil 2022.



Luis Duff, Sumvitg

Gl'onn vargau hai jeu giu bien. Jeu sun sauns e taffers ed era engrazieivels ch'jeu astgel guder ina buna sanadad. Cun mia annada 1935 secapescha quei buca da sesez. Per mantener la buna constituiun mondel jeu mintga di treis tochen quater uras giuadora ed a pei. Jeu stoi dir ch'ei fuss bi da vegnir 100 onns aschia sco jeu sesentel ussa. Per gl'onn 2022 giavischass jeu da puder ir vinavon per cristallas. Schi ditg ch'jeu pos mondel jeu siadora.

Maja Flach, Sagogn

Malgrad las cundiziuns pli grevas havein miu um ed jeu saviu far entgens viadis. Nus fagein part d'ina organisaziun internaziunala cun brat da habitaziuns. Aschia havein nus passentau il settember a Marseille duas jamnas en ina casa aulta cun vesta fantastica sur il port e la mar. Gl'onn vargau havein nus era profitau dad ir cun skis en territoris pli pigns nua ch'ei ha aunc runals e sutgeras. Aschia havein nus empriu d'enconuscher Malbun, Brambrüesch, Avras enqual auter. Gl'onn 2022 havein nus aunc buca planisau viadis. In gi da naschientscha rondund vegn ei a dar.



Selda Cavegn, Breil


Jeu sai buca tschintschar da highlights positivs il 2021. Ils 18 d'uost ei miu um morts d'ina greva malsogna. Tgei ch'jeu sundel fetg engrazieivla ei ch'el ha aunc saviu tener en bratsch il matg nies secund biadi. Gianin e siu frar Laurin ein per mei ils dus sulegls. Gl'onn 2022 havein nus en vesta in project da famiglia, nus vulein numnadamein ir tuts ensemel el Canada. Aunc avon che miu um vegni malsauns havevan nus planisau quei viadi. Ussa sperel jeu fetg ch'ei seigi pusseivel da realisar el.





Sora Annemarie Müller, Glion

Jeu hai giu il 2021 in grond lev demai che nus havein saviu reglar il futur da nossa claustra. Nus essan cheu a Glion aunc 84 soras, sigl entir mund essan nus 112. E sche las soras giuvas vegnan buca pli sunter drova la claustra ina basa solida per sia strategia «pasch e senn dalla veta». L'occurrenza «Ilanz-er Sommer» ha fatg grond plascher ed ei stau in success. Gl'onn 2022 selegrel jeu fetg silla secunda ediziun ch'ei dils 7 tochen ils 13 d'uost. Sco priura generala havess jeu gl'onn proxim il grond giavisch da visitar puspei nossas 28 consoras che vivan e lavuran a Taiwan ed en Brasilia.



Naima Carisch, Panaduz

Gl'onn vargau vegnan endament a mi divers highlights. Inagada ei quei las bialas vacanzas el Tessin. Vinavon havein nus priu si definitivme in gat che mava adina en ed ora tier nus, Baileys fa a nus grond plascher. Lu hai jeu astgau separticipar gl'onn vargau al camp dad ir cun auto dil TCS el Tessin. Quei ei stau super. Pigl onn 2022 spetga mei la lavur da matura. Jeu vi construir ina sauna da curtgin. Igl ei in project ch'jeu vi planisar e realisar senza en tuts detagls. Sch'enzatgei savess aunc dar a mi leutier in tip prendel jeu bugen quel.



Catrina Arpagaus, Trun

Miu punct culminont dil 2021 ei staus claramain ch'igl ei reussiu a mi da gudignar per la tiarza gada il tetel da campiu-nessa grischuna da siglir cun cavagl. Quei eveniment a Maivilla resta en meglia regurdientscha. Che nus havein giu in bien onn da fatschenta el consum da Trun fa naturalme in plascher special. Gl'onn 2022 sperel jeu che nies project da baghegiar casa a Zignau mondi vinavon, jeu manegiel ch'el seigi sin buna via. Ch'ei mondi vinavon schi bein culla famiglia e culs cavals lessel buca emblidar da menziunar.





La Quotidiana
7000 Cuera
081/ 544 89 10
<https://www.suedostschweiz.ch/laquoti...>

Medienart: Print
Medientyp: Tages- und Wochenpresse
Auflage: 3'439
Erscheinungsweise: 5x wöchentlich

Seite: 3
Fläche: 122'601 mm²

Auftrag: 3009371
Themen-Nr.: 140.008

Referenz: 82941159
Ausschnitt Seite: 5/5

Tarcisi Cavigelli, Siat

Dapi nov onns hai jeu da sbatter cun problems da sanadad. Il december 2020 sundel jeu vegnius silla gliesta da spetga per in narunchel. Igl ei immens grev d'anflar personas donaturas. En quei connex ha ei dau gl'onn 2021 ina gronda sorpresa per mei: La primavera vargada ha miu frar dumandau tut nunspitgadamein sch'jeu vegli in da ses narunchels. Quei ei per mei il pli grond schenghetg pusseivel, jeu sundel nungetg engrazieivels ad el. Las proximas jamnas ei il termin el spital a Turitg. Per mei dat ei cunquei mo in project che ha prioritad il 2022. Jeu selegrel ferg da puspei saver ir la stad silla pezza.

